

**BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
GRAD SARAJEVO  
OPĆINA STARI GRAD SARAJEVO  
OPĆINSKI NAČELNIK**

*-Nacrt-*

***ODLUKA O USVAJANJU  
URBANISTIČKOG PROJEKTA  
"TRG OSLOBOĐENJA - ALIJA IZETBEGOVIĆ"***

**Nosilac pripreme Plana:**  
Načelnik Općine Stari Grad  
Sarajevo

**Nosilac izrade Plana:**  
Zavod za planiranje razvoja  
Kantona Sarajevo

**Sarajevo, decembar 2020. godine**

Na osnovu člana 25. stav 8. Zakona o prostornom uređenju Kantona Sarajevo ("Službene novine Kantona Sarajevo", broj 24/17 i 1/18), te člana 10. stav 1. i člana 25. stav 1. Statuta Općine Stari Grad Sarajevo ("Službene novine Kantona Sarajevo", broj 20/13 – prečišćeni tekst), Općinsko vijeće Stari Grad Sarajevo, na redovnoj sjednici održanoj dana .....2020. godine, donijelo je

## ***ODLUKU O USVAJANJU URBANISTIČKOG PROJEKTA "TRG OSLOBOĐENJA - ALIJA IZETBEGOVIĆ"***

### Član 1.

Usvaja se Urbanistički projekat "Trg oslobođenja-Alija Izetbegović" (u daljem tekstu: Plan).

### Član 2.

Plan se sastoji od tekstualnog i grafičkog dijela.

Tekstualni dio sadrži:

- Postojeće stanje i projekciju izgradnje i uređenja prostorne cjeline sa namjenom površina i urbanističko-tehničkim uvjetima za izgradnju u okviru Plana
- Odluku o provođenju Plana

Grafički dio sadrži:

- Urbanizam prezentiran na odgovarajućem broju tematskih karata i to:
  - karta 1.- Izvod iz Programa razvoja gradskog jezgra ("Službene novine Kantona Sarajevo", br. 13/00)
  - karta 2.-Ažurna geodetska podloga sa katastrom podzemnih instalacija
  - karta 3.-Posjedovno stanje
  - karta 4.-Postojeće stanje
  - karta 5.-Planirana namjena površina
  - karta 6.-Arhitektonsko-urbanističko rješenje/Osnova partera
  - karta 7.-Idejni projekat garaže- Osnova etaže -1
  - karta 8.-Idejni projekat garaže- Osnova etaže -2
  - karta 9.-Idejni projekat garaže- Osnova etaže -3
  - karta 10.-Idejni projekat garaže- Presjeci
  - karta 11.-Idejni projekat garaže- Prostorni prikazi
  - karta 12.-Mreža građevinskih i regulacionih linija
- Analitička obrada građevinske i regulacione linije
- Idejno rješenje saobraćaja
- Idejno rješenje hortikulture
- Idejno rješenje snabdijevanja vodom

- Idejno rješenje odvodnje otpadnih i oborinskih voda
- Idejno rješenje toplifikacije i gasifikacije
- Idejno rješenje elektroenergetike i javne rasvjete
- Idejno rješenje TK mreže.

### Član 3.

Po jedan primjerak ovjerenog elaborata nalazi se na stalnom javnom uvidu i čuva se u službi dokumentacije Općine Stari Grad Sarajevo i u Zavodu za planiranje razvoja Kantona Sarajevo.

### Član 4.

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

*Predsjedavajući Općinskog vijeća*

Broj:  
Sarajevo,

## ***O B R A Z L O Ž E N J E***

### **Pravni osnov**

Zakonski osnov za donošenje ove Odluke sadržan je u odredbama člana 25. stav 8. Zakona o prostornom uređenju Kantona Sarajevo ("Službene novine Kantona Sarajevo", broj 24/17 i 1/18), te člana 10. stav 1. i člana 25. stav 1. Statuta Općine Stari Grad Sarajevo ("Službene novine Kantona Sarajevo", broj 20/13 – prečišćeni tekst).

Prema Zakonu o prostornom uređenju Kantona Sarajevo, uz Plan se prilaže i Odluka o usvajanju Plana.

Statutarni osnov za donošenje ove odluke su članovi 10. i 25. Statuta Općine Stari Grad Sarajevo, kojim je regulisano da općina, kao jedinica lokalne samouprave, vodi urbanističko-stambenu politiku od značaja za Općinu, odnosno da Općinsko vijeće donosi odluke i druge propise iz nadležnosti Općine kao jedinice lokalne samouprave.

**BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
GRAD SARAJEVO  
OPĆINA STARI GRAD SARAJEVO  
OPĆINSKI NAČELNIK**

*- Nacrt -*

***ODLUKA O PROVOĐENJU  
URBANISTIČKOG PROJEKTA  
"TRG OSLOBOĐENJA - ALIJA IZETBEGOVIĆ"***

**Nosilac pripreme Plana:**  
Načelnik Općine Stari Grad  
Sarajevo

**Nosilac izrade Plana:**  
Zavod za planiranje razvoja  
Kantona Sarajevo

**Sarajevo, decembar 2020. godine**

Na osnovu člana 25. stav 10. Zakona o prostornom uređenju Kantona Sarajevo ("Službene novine Kantona Sarajevo", broj 24/17 i 1/18), te članova 10. i 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13), Općinsko vijeće Stari Grad, na redovnoj sjednici održanoj dana .....2020. godine, donijelo je

## **ODLUKU O PROVOĐENJU URBANISTIČKOG PROJEKTA "TRG OSLOBOĐENJA - ALIJA IZETBEGOVIĆ"**

### Član 1.

Ovom Odlukom uređuje se provođenje Urbanističkog projekta "Trg oslobođenja-Alija Izetbegović" (u daljem tekstu Plan), a naročito: granice prostorne cjeline, namjena površina, urbanističko-tehnički uslovi za izgradnju građevina i uređenje građevinskog zemljišta, uređenje javnih pješačkih površina, izgradnja centralnog spomen-obilježja i odnos prema postojećim spomen-obilježjima, uređenje zelenih i slobodnih površina, uslovi privremenog korištenja javnih površina, uređenje i postavljanje urbanog mobilijara, te mjere zaštite prava lica sa smanjenim tjelesnim sposobnostima.

### Član 2.

#### Opis granice:

Granica obuhvata polazi od tačke br.1 koja se nalazi na granici između političkih općina Stari Grad i Centar, a ima koordinate  $y=6534472$ ,  $x=4857230$ , potom produžava na istok idući putem k.č. 2003/2, i dolazi u tačku br.2 sa koordinatama  $y=6534544$ ,  $x=4857243$ , a nalazi se na parceli k.č. 2003/2, potom se lomi na jug idući međom parcele k.č.2022/1 (obuhvata je) i dolazi u tačku br.3 koja ima koordinate  $y=6534551$ ,  $x=4857551$ , zatim se lomi u blagom luku do tačke br. 4 koja ima koordinate  $y=6534548$ ,  $x=4857181$ , a nalaze se na parceli k.č.2022/1, nastavlja u pravcu juga sijekući parcele k.č. 2022/1 i 2120/2 i dolazi do tačke br. 5 koja se nalazi na parceli k.č. 2120/2, a ima koordinate  $y=6534553$ ,  $x=4857148$ . Granica obuhvata produžava na jugoistok idući putem k.č. 2150/2 u dužini od 31m, i dolazi u tačku br.6 sa koordinatama  $y=6534522$ ,  $x=4857143$ , potom se lomi na jug, te zapad, idući međom parcele k.č. 2055/1 (obuhvata je) i dolazi do granice između političkih općina Stari Grad i Centar, kojom produžava na sjever i dolazi do mjesta odakle je opis granice i počeo.

Sve gore navedene parcele se nalaze u K.O. Sarajevo XI, Općina Stari Grad.

Površina obuhvata iznosi  $P=0,84$  ha.

### Član 3.

Uređenje zemljišta i izgradnja na predmetnom lokalitetu se mora izvesti u obimu i na način kako je to predviđeno Planom.

#### Član 4.

U obuhvatu ovog Plana, definisane su sljedeće namjene:

- zona trga sa uređenim zelenilom i podzemnom garažom.....0.58 ha,
- zona trga sa uređenim zelenilom i saobraćajem pod režimom.....0.17 ha,
- zona pješačkog saobraćaja - šetnica.....0.03 ha,
- zona kolskog saobraćaja.....0.06 ha.

#### Član 5.

Urbanističko-tehnički uslovi za izgradnju građevine (javna podzemna garaža) i uređenje javnih pješačkih površina (trgovi):

- Građevinska parcela za izgradnju podzemne garaže je utvrđena regulacionom linijom i definisana na grafičkom prilogu Plana.
- Građevinska linija je naznačena na grafičkom prilogu Plana i ista označava dio građevinske parcele na kojoj je moguće izgraditi građevinu, odnosno linija koju ne može preći ni najistureniji dio građevine. Građevinskom linijom je utvrđena udaljenost objekta od regulacione linije. Unutar građevinskih linija investitor može definisati tlocrt građevine.
- Građevinska linija ne može prelaziti regulacionu liniju, osim ako ista nije predviđena Planom.
- Planom su predviđene tri podzemne etaže garaže, sa ukupno 242 parking mjesta.
- Ukoliko je potrebno, u cilju dobivanja kvalitetnijeg rješenja podzemne garaže, moguće je odstupanje od istog koje je dato ovim Idejnim projektom, u smislu: primjenjenog konstruktivnog sistema, povećanja konstruktivne visine etaža (a samim tim i povećanja svijetle visine) – isključivo na račun dodatnog ukopavanja objekta, a unutar utvrđene građevinske linije.
- Pješački ulazi/izlazi u garažu su predviđeni na trgu i to na dva mjesta, u vidu vertikalnih komunikacija (otvoreno stepenište i stakleni lift).
- Prije izdavanja odobrenja za građenje objekta garaže potrebno je pribaviti Detaljan geotehnički izvještaj sa utvrđenim uslovima temeljenja i obezbjeđenja stabilnosti objekta koji treba biti urađen od strane ovlaštene institucije.
- Obavezna je izrada projekta osiguranja građevinske jame, kojim će se predvidjeti odgovarajuće tehničke mjere u cilju zaštite od podzemnih i površinskih voda kao i obrušavanja terena.
- Statički proračun planirane građevine mora biti dimenzioniran za zaštitu od potresa jačine najmanje 8 stepeni MCS.
- Izgradnja garaže ne može započeti prije izmještanja podzemnih instalacija.
- Kod projektovanja krovne površine garaže (trg i zelene površine) potrebno je voditi računa o adekvatnoj statičkoj stabilnosti i očekivanom opterećenju konstrukcije.
- Garažu projektovati prema raspoloživim tehničkim rješenjima vezano za zakonske odredbe i usmjerenja iz oblasti zaštite sredine (Pravilnik o programima i postrojenjima koji mogu biti izgrađeni i pušteni u rad ako imaju okolinsku dozvolu, "Službene novine Kantona Sarajevo", br.08/11) kako bi se spriječili negativni uticaji na neposredno okruženje.
- Uređaji i instalacije koji su u funkciji tehnološkog procesa normalnog odvijanja rada podzemne garaže, trebaju biti u okviru osnovnog gabarita arhitektonskog objekta.

- Dijelove uređaja i instalacija koji se moraju pojaviti iznad garaže-u nivou partera, potrebno je oblikovno prilagoditi prostoru koji se nalazi iznad garaže, odnosno "sakriti" u elemente urbanog mobilijara.
- Površina trga je najvećim dijelom popločana; obrada iste treba da bude riješena tako da omogući multifunkcionalno korištenje trga uz upotrebu kvalitetnih i trajnih materijala koje je lako održavati.  
Preporuka je da se pješačke površine-trgovi popločaju kamenim pločama (granit), u vidu kombinacije elemenata različitih dimenzija, boja i obrade; konačan izbor materijalizacije podnih površina i prateće podne opreme, te izbor i razmještaj urbane opreme na predmetnom lokalitetu će se utvrditi kroz izradu Glavnog projekta za izgradnju javne podzemne garaže i uređenje trgova, u čijoj izradi treba aktivno da učestvuje Kantonalni zavod za zaštitu kulturno-historijskog i prirodnog naslijeđa Sarajevo.
- Sastavni dio projektne dokumentacije podzemne garaže je i projekat uređenja trga sa hortikulturom.
- Vertikalne pješačke komunikacije (stepenište i liftovi) u nivou partera izvesti u vidu transparentnih ploha (kombinacija čelične konstrukcije i sigurnosnog transparentnog stakla).
- U cilju unaprijeđenja javnog prostora trga, isti oplemeniti elementima urbane opreme (mobilijara), i to: elementima za odmor-klupama, kantama za otpatke, ukrasnim žardinjerama, držačima za bicikle, stubovima za zastave (jarboli), kioscima za prodaju novina, nadstrešnicama za stajališta gradskog saobraćaja, opremom i uređajima za regulaciju saobraćaja (parking barijere, stubići) i kulturno-turističkim tablama za označavanje kulturno-historijskih znamenitosti i spomenika. Također, potrebno je definisati odgovarajuće funkcionalno i dekorativno osvjetljenje i uklopiti ga u konačno arhitektonsko-urbanističko rješenje uređenja trga.
- Pri izboru urbane opreme voditi računa da ista:
  - omogući multifunkcionalno korištenje trga,
  - ne ometa vizure- kako na objekte od značaja, tako i na panoramu prostora,
  - ne remeti osnovne pješačke tokove,
  - nije postavljena u uglove saobraćajne preglednosti, i
  - ne ometa korištenje postojećih objekata i postojeće komunalne opreme na predmetnom lokalitetu.
- Prelazi preko ulica, prilazi objektima, pasaži i druge pješačke površine moraju se projektovati i izvesti na način da ih mogu koristiti lica u invalidskim kolicima i invalidna lica otežanog kretanja-prema Uredbi o urbanističko-tehničkim uslovima, prostornim standardima i normativima za otklanjanje i sprječavanje stvaranja arhitektonsko-urbanističkih barijera za kretanje invalidnih lica koja koriste tehnička i ortopedska pomagala ("Službene novine Kantona Sarajevo", broj 5/00).
- Preporuka je da se na adekvatnu lokaciju izmjesti sprave za rekreaciju na otvorenom, koje su postavljene neposredno uz samu granicu obuhvata Plana, na zelenoj površini uz Sabornu crkvu.

## Član 6.

Na dijelu platoa ispred Doma Oružanih snaga BiH uvodi se saobraćaj pod režimom (pristup motornim vozilima je dozvoljen samo za objekte koji su, u smislu



saobraćajnog pristupa, orijentisani na ovaj trg) i to postavljanjem vertikalne saobraćajne signalizacije.

#### Član 7.

Urbanističko-tehnički uslovi za izgradnju Centralnog spomen-obilježja svim poginulim braniteljima opkoljenog Sarajeva 1992-1995.godine na području Kantona Sarajevo:

Površina za postavljanje Centralnog spomen-obilježja predložena je i naznačena na graf. prilogu: Arhitektonsko-urbanističko rješenje/Osnova partera (list br.6.), i to na dijelu trga koji je orijentisan prema zelenilu predviđenom prema ulici Zelenih beretki. U slučaju potrebe, položaj istog može biti drukčiji od naznačenog, i to pod uslovom da spomen-obilježje svojom postavkom ne narušava cjelovitost trga i njegovo multifunkcionalno korištenje.

Konačan izgled i položaj Centralnog spomen-obilježja biće utvrđen od strane Ministarstva prostornog uređenja, građenja i zaštite okoliša Kantona Sarajevo i Ministarstva za boračka pitanja Kantona Sarajevo, koji će autorima trećenagrađenih konkursnih radova radova uputiti poziv da svoje konkursne radove prilagode novom rješenju trga (u skladu sa novim funkcijama na nivou trga/partera i ispod njega), te će se izabrati rješenje koje će biti ugrađeno u Plan.

#### Član 8.

Odnos prema postojećim spomen-obilježjima na lokalitetu

Prema Separatu zaštite kulturno–historijskog i prirodnog naslijeđa, koji je urađen 2007. godine, za potrebe izrade ranije usvojenog Urbanističkog projekta "Trg oslobođenja-Alija Izetbegović" ("Službene novine Kantona Sarajevo", br.28/08), neophodno je preduzeti slijedeće mjere:

- Skupina bista bosanskohercegovačkih književnika na lokalitetu Trg oslobođenja-Alija Izetbegović je jedini evidentirani spomenik kulturno-historijskog naslijeđa; iste se zadržavaju, uz izradu novih, redizajniranih, postolja i pozicioniraju unutar planiranih arli, na dijelu trga prema Sabornoj crkvi - prema grafičkom prilogu: Arhitektonsko-urbanističko rješenje/Osnova partera (list br. 6);
- Skulptura "Multikulturalni čovjek" - preporučuje se izmještanje na prostor trga iznad podzemne garaže "Stari Grad" u ulici Avdage Šahinagića, pri čemu treba voditi računa da spomenik svojom postavkom ne remeti multifunkcionalno korištenje ovog trga;  
Međutim, ukoliko izmještanje ovog spomenika na predloženu lokaciju nije moguće, i ukoliko se ne nađe adekvatna lokacija unutar teritorije matične općine, preporuka je da se isti izmjesti ili na odgovarajuću lokaciju u naseljima Mojmiilo ili Dobrinja (administrativni teritorij općine Novi Grad Sarajevo- s obzirom na to da su ova naselja osiromašena u smislu zastupljenosti spomeničkih sadržaja), ili neku drugu lokaciju predviđenu Elaboratom o mogućim lokacijama za postavljanje spomenika, spomen-obilježja i spomen-ploča na području grada Sarajeva a koji su od interesa za grad Sarajevo ("Službene novine Kantona Sarajevo", br. 49/19), te da se njegovo konačno odredište utvrdi prije započinjanja građevinskih radova na lokalitetu Trg oslobođenja-Alija Izetbegović;

- Spomen-obilježje Prvoj policijskoj brigadi-potrebno je izraditi novo spomen-obilježje Prvoj policijskoj brigadi, odgovarajuće estetske i umjetničke vrijednosti-u skladu sa dignitetom palih, te ga locirati prema grafičkom prilogu: Arhitektonsko-urbanističko rješenje/Osnova partera (list br.6);
- Spomenik iz 1977. godine ovim Planom se ne zadržava.

#### Član 9.

Izgradnja podzemne garaže i formiranje višenamjenskog prostora-trga, ne ostavljaju prostornu mogućnost za zadržavanje postojećih elemenata biološke komponente sve tri vegetacione etaže.

Ovim Projektom oni su predviđeni za uklanjanje, a u skladu sa preporukama Zavoda za zaštitu kulturno-historijskog i prirodnog naslijeđa Kantona Sarajevo.

Pojedinačni primjerci stablašica, a koji se nalaze van gabarita podzemne garaže, se zadržavaju i uklapaju u buduće hortikulturno uređenje.

Izgradnja i uređenje zelenih površina vrši se u skladu sa prethodno pribavljenom odgovarajućom tehničkom dokumentacijom urađenom na osnovu Idejnog projekta hortikulture, koji je sastavni dio ovog Plana, a koji je verifikovan od strane Zavoda za zaštitu kulturno-historijskog i prirodnog naslijeđa Kantona Sarajevo.

Tehnička dokumentacija za hortikulturno uređenje trga, mora biti urađena i verifikovana od strane stručnog i odgovornog lica/firme za projektovanje zelenih površina.

Sadni materijal odabranih vrsta, prvenstveno dendroflora, ali ostalih elemenata biološke komponente (perene, sezonsko cvijeće i trava) moraju biti visokog kvaliteta uz obavezan certifikat, te parametrima: uzrastom, razvijenošću debla, krošnje i korijenovog sistema moraju odgovarati parametrima zadatim kroz tehničku dokumentaciju.

Neophodno je obezbijediti nadzor prilikom izvođenja svih hortikulturnih radova, kao i tehnički pregled svih izvedenih radova na realizaciji.

#### Član 10.

U skladu sa Zakonom o privremenom korištenju javnih površina na području Kantona Sarajevo ("Službene novine Kantona Sarajevo", br: 20/04, 26/12, 32/12 i 24/15), može se odobriti privremeno zauzimanje javnih površina - u svrhu održavanja kuturnih, zabavnih, sportskih i humanitarnih manifestacija, što podrazumijeva postavljanje: montažno-demontažne bine, platna za projekciju, mobilnih kućica za sajmove/markete, slobodnostojećih reklamnih panoa i slobodnostojećih displeja, postavljanje stolova i stolica za slobodnostojeće ljetne bašte i sl.

Po isteku vremenskog roka određenog aktom za privremeno korištenje javne površine, isti se moraju ukloniti i površina privesti prvobitnoj namjeni.

U skladu sa gore navedenim, dozvoljeno je postavljanje stolova i stolica za ljetne bašte, pod sljedećim uslovima (a pored uslova naznačenih u čl.5 ove Odluke, koji se odnose na postavljanje urbane opreme na navedenom lokalitetu):

- slobodnostojeće ljetne bašte mogu biti postavljene po rubu trga – prema zgradi "Svjetlost" i zgradi Ekonomskog fakulteta; nije dozvoljeno postavljanje istih u centralnom dijelu ovog trga, niti prema ulici Ferhadija – u cilju nesmetanih

pješaćkih kumunikacija prema trgu i sa trga, kao ni na trgu ispred Doma oružanih snaga BiH,

- stolovi i stolice se mogu postaviti isključivo u nivou trga, odnosno bez izvedbe platforme,
- dozvoljeno je postavljanje zaštite za sunce (tende ili suncobrani),
- sva oprema za slobodnostojeće bašte na predmetnom lokalitetu - prostoru trga, mora biti jednoobrazna - u smislu vrste mobilijara, materijalizacije, boje i i sl., što će biti propisano kroz odgovarajuće odobrenje/rješenje nadležne općinske službe.

S obzirom na to da se radi o užem gradskom jezgru, nadležne općinske službe bi trebale - u cilju zaštite kulturno-historijskog ambijenta, kroz svoje odluke o privremenom korištenju javnih površina te utvrđivanja urbanističko-tehničkih uslova za postavljanje privremenih sadržaja na prostoru trga, uključiti Kantonalni zavod za zaštitu kulturno-historijskog i prirodnog naslijeđa Sarajevo.

#### Član 11.

Danom stupanja na snagu ove Odluke prestaje da važi Odluka o provođenju Urbanističkog projekta: "Trg oslobođenja-Alija Izetbegović" ("Službene novine Kantona Sarajevo, br.28/08).

*Predsjedavajući Općinskog vijeća*

.....

Broj:  
Sarajevo, .....2020. godine

## ***OBRAZLOŽENJE***

### **Pravni osnov**

Zakonski osnov za donošenje ove odluke sadržan je u odredbama člana 25. stav 10. Zakona o prostornom uređenju ("Službene novine Kantona Sarajevo", broj 24/17 i 1/18), kojim je utvrđena nadležnost općinskog vijeća da donosi urbanističke projekte.

Statutarni osnov za donošenje ove odluke su članovi 10. i 25. Statuta Općine Stari Grad, kojim je regulisano da je općina, kao jedinica lokalne samouprave, nadležna za regulisanje pitanja iz oblasti prostornog uređenja i urbanizma, odnosno da Općinsko vijeće donosi odluke i druge propise iz nadležnosti Općine kao jedinice lokalne samouprave.

### **Planski osnov**

Planski osnov za izradu Urbanističkog projekta "Trg oslobođenja- Alija Izetbegović" je plan višeg reda - Program razvoja gradskog jezgra Sarajeva ("Službene novine Kantona Sarajevo", broj 13/00). S obzirom na to da je istim za ovaj lokalitet utvrđena obaveza izrade urbanističkog projekta, sa osnovnim usmjerenjima da uređenje ovog trga bude u funkciji spomen-obilježja svim palim braniocima Sarajeva, okupljanja i odmora kao centralni prostor pješačke zone, Plan je rađen u skladu sa instrukcijom dostavljenom od strane Ministarstva prostornog uređenja, građenja i zaštite okoliša Kantona Sarajevo (akt br. 05/01-19-34602/20 od 09.09.2020.godine).

### **Sadržaj odluke**

Odluka je sačinjena na osnovu Uredbe o jedinstvenoj metodologiji za izradu planskih dokumenata ("Službene novine Federacije BiH" br. 63/04 i 50/07) i sadrži sve propisane elemente iz navedene Uredbe.




**URBANISTIČKI PROJEKT  
"TRG OSLOBOĐENJA - ALIJA IZETBEGOVIĆ"**

ARHITEKTONSKO - URBANISTIČKO RJEŠENJE /  
OSNOVA PARTERA R 1:250

**LEGENDA :**

- ■ ■ ■ GRANICA OBUHVATA URBANISTIČKOG PROJEKTA
- ■ ■ ■ ADMINISTRATIVNA GRANICA OPĆINA
- — — — REGULACIONA LINIJA GRADEVINSKE PARCELE
- — — — GRADEVINSKA LINIJA PODZEMNE GARAJE
- ■ ■ ■ POPLOČANE PJEŠAČKE POVRŠINE SA URBANIM MOBILIJAROM
- ■ ■ ■ UREĐENE ZELENE POVRŠINE
- ■ ■ ■ POSTOJEĆE (ZADRŽANO) DRVEĆE
- ■ ■ ■ PLANIRANE VRSTE
- ○ ○ ○ FONTANA
- ■ ■ ■ LOKACIJE ZA POSTAVLJANJE SPOMEN-BISTA BOSANSKOHERCEGOVAČKIH KNJIŽEVNIKA
- ■ ■ ■ LOKACIJA ZA POSTAVLJANJE SPOMENIKA PRVOJ POLICIJSKOJ BRIGADI
- ■ ■ ■ POVRŠINA ZA POSTAVLJANJE CENTRALNOG SPOMEN-OBLIJEŽJA SVIM POGINULIM BRANITELJIMA OPKOLJENOG SARAJEVA 1992-1995. GODINE (prema členu 7. Odluke o provođenju Plana)
- ■ ■ ■ POVRŠINE ZA POSTAVLJANJE SADRŽAJA PRIVREMENOG KARAKTERA
- ▲ ▲ ▲ ▲ KOLSKI ULAZ / IZLAZ - GARAJA
- ▲ ▲ ▲ ▲ PJEŠAČKI ULAZ / IZLAZ - GARAJA
- — — — SAOBRAĆAJNE POVRŠINE
- ■ ■ ■ TERMINAL JAVNOG GRADSKOG PREVOZA



Napomena: Uslijed neusklađenosti granica političkih općina Stari Grad Sarajevo i Centar Sarajevo (samim tim i granica katastarskih općina po kojima je iscrtan obuhvat Plana), došlo je do određenih odstupanja istih u odnosu na važeće granice katastarskih parcela koje se vode u općinskim katastarskim operatima.

ZAVOD ZA PLANIRANJE RAZVOJA KANTONA SARAJEVO			
NARUČILAC:	NAČELNIK OPĆINE STARI GRAD SARAJEVO	RAZMJERA:	DMENZIJA:
ELABORAT:	URBANISTIČKI PROJEKT "TRG OSLOBOĐENJA - ALIJA IZETBEGOVIĆ"	1:250	92 x 72
FAZA:	URBANIZAM	DATUM:	12.2020.
SADRŽAJ:	ARHITEKTONSKO - URBANISTIČKO RJEŠENJE / OSNOVA PARTERA	BROJ PRILOGA:	6.